

大智度論



大智度論卷第二十五

龍樹菩薩造

姚秦三藏法師鳩摩羅什譯

釋初品中四無畏四無礙智

四無所畏者。佛作誠言。我是一切正智人。若有沙門婆羅門。若天若魔若梵。若復餘眾。如實言是法不知。乃至不見。是微畏相。以是故。我得安隱。得無所畏。安住聖主處。如牛王在大眾中。師子吼。能轉梵輪。諸沙門婆羅門。若天若魔若梵。若復餘眾。實不能轉。一無畏也。佛作誠言。我一切漏盡。若有沙門婆羅門。若天

若魔若梵。若復餘眾。如實言是漏不盡。乃至不見是微畏相。以是故。我得安隱得無所畏。安住聖主處。如牛王在大眾中。師子吼能轉梵輪。諸沙門婆羅門。若天若魔若梵。若復餘眾。實不能轉。二無畏也。佛作誠言。我說障法。若有沙門婆羅門。若天若魔若梵。若復餘眾。如實言受是障法。不障道。乃至不見是微畏相。以是故。我得安隱得無所畏。安住聖主處。如牛王在大眾中。師子吼能轉梵輪。諸沙門婆羅門。若天若魔若梵。若復餘眾。實不能轉。三無畏也。佛作誠言。我所說聖道。能出世間。行是道。能盡諸苦。若有沙門婆羅

門。若天若魔。若梵若復餘眾。如實言行是道。不能出世閒。不能盡苦。乃至不見是微畏相。以是故。我得安隱。得無所畏。安住聖主處。如牛王在大眾中。師子吼。能轉梵輪。諸沙門婆羅門。若天若魔。若梵若復餘眾。實不能轉。四無畏也。問曰。以何事故。說四無所畏。荅曰。有人言。佛自稱一切智。一切見。世閒一切經書技術。智巧方便。甚多無量。若一切眾生共知一切事。猶尙難。況佛一人而有一切智。或有是事。有是事難。佛將無有畏。欲斷是疑妄。斷是難故。佛說四無所畏。復次。若佛未出世。外道等種種因緣。欺誑求道求福人。

或食種種果。或食種種菜。或食種種草根。或食牛屎。或食穉稗。或日一食。或二日。或十日。一月。二月。一食。或噯風飲水。或食水衣。如是等種種食。或衣樹皮。樹葉。草衣。鹿皮。或衣板木。或在地臥。或臥杵上。杖上。灰上。棘上。或寒時入水。或熱時五熱自炙。或入水死。入火死。投巖死。斷食死。如是等種種苦行法中。求天上。求涅槃。亦教弟子。令不捨是法。如是引致少智眾生。以得供養。譬如螢火蟲。日未出時。少多能照。若日出時。千光明照。月及眾星皆無有明。豈況螢火。若佛未出世。諸外道輩。小明照世。得供養。佛出世時。以大智。

光明滅諸外道。及其弟子。皆不復得供養。以失供養。利故。便妄語謗佛。及佛弟子。如孫陀利經中說。自殺孫陀利。而謗佛。語眾人言。世間弊人。尚不爲是。是人世閒禮法。尙不能知。何況涅槃佛欲滅如是等誹謗。故自說實功德。四無所畏。言我獨是一切智人。無有能如實言。佛不能知。我不畏是事。我獨一切諸漏及習盡。無有能如實言。佛漏未盡。我不畏是事。我說遮涅槃道法。無有能如實言。是法不能遮涅槃佛。不畏是事。佛說苦盡。道達到涅槃。無有能如實言。是道不能到涅槃。佛不畏是事。略說是四無所畏體。一者正

知一切法。二者盡一切漏及習。三者說一切障道法。四者說盡苦道。是四法中。若有如實言。不能盡徧知。佛不畏是事。何以故。正徧知了了。故初二無畏。爲自功德具足。故後二無畏。爲具足利益眾生。故復次初第一第三無畏中說智。第二第四無畏中說斷智。斷具足。故所爲事畢。問曰。十力皆名智。四無所畏亦是智。有何等異。答曰。廣說佛諸功德是力。略說是無畏。復次能有所作是力。無所疑難是無畏。智慧集故名力。散諸無明。故是無畏。集諸善法。故名力。滅諸不善法。故名無畏。自有智慧。故名力。無能壞者。故名無畏。

智慧猛健是力。堪受問難是無畏。集諸智慧是名力。
智慧外用是無畏。譬如轉輪聖王七寶成就是力。得
是七寶已。周四天下無不降伏。是名無畏。又如良醫
善知藥方。是名力。合和諸藥與人。是名無畏。自利益
是名力。利益他是無畏。自除煩惱是名力。除他煩惱
是無畏。無能沮壞是名力。不難不退是無畏。自成已
善是名力。能成他善是無畏。巧便智是名力。用巧智
是無畏。一切智。一切種智是名力。一切智。一切種智
顯發是無畏。十八不共法是名力。十八不共法顯發
於外。是無畏。徧通達法性是名力。若有種種問難。不

復思惟。卽時能答。是無畏。得佛眼。是名力。佛眼見已。
可度者爲說法。是無畏。得三無礙智。是名力。得應辯。
無礙。是無畏。義無礙。智是名力。樂說無礙。智是無畏。
一切智自在。是名力。種種譬喻。種種因緣。莊嚴語言。
說法。是無畏。破魔眾。是名力。破諸外道論議師。是無
畏。如是等種種因緣。分別力。無畏。問曰。何等名無所
畏。答曰。得無所疑。無所忌難。智慧不卻。不沒。衣毛不
豎。在在法中。如說卽作。是無畏。問曰。云何當知佛無
所畏。答曰。若有所畏。不能將御大眾。能攝能捨。能苦
切治。或輒語教。如佛一時能驅遣舍利弗。目連等。還

復憐愍心受。若有所忌難者。諸論議師輩。住憍慢山頂。以外智慧心狂醉。皆言天下唯有我一人。更無餘人。自於經書決定知故。破他經書。論議以惡口訾毀。如狂象無所護惜。如是狂人。庵跋咤長爪薩遮祇尼。捷毘盧毖等。諸大論議師皆降伏。若有所畏。則不能爾。及憍陳如等五出家人。優樓頻螺迦葉等千結髮仙人。舍利弗目犍連摩訶迦葉等。於佛法中出家。及百千釋子。并諸閻浮提大王。波斯匿大王。頻婆娑羅王。旃陀波殊提王。優填王。弗迦羅婆利王。梵摩達王等。皆爲弟子。諸在家婆羅門。皆度一切世閒智慧。爲

大國王所師仰。梵摩喻弗迦羅婆利鳩羅檀陀等。皆爲弟子。有得初道。有得第二第三第四道。諸大鬼神。阿羅婆迦鞞沙迦等。諸大龍王。阿波羅羅伊羅鉢多羅等。鴛羣黎摩羅諸惡人等。皆降化歸伏。若有所畏。不能獨在樹下。師子座處坐。欲得阿耨多羅三藐三菩提時。魔王軍眾。化作師子虎狼熊羆之首。或一眼或多眼。或一耳或多耳。擔山吐火。四邊圍遶。佛以手指按地。瞬息之頃。卽皆消滅。諸天阿修羅。鞞摩質帝隸。釋提婆那民。梵天王等。引導其心。皆爲弟子。若有所畏。不能在此大眾中說法。以無所畏故。能爲如是。

諸天鬼神大眾中說法。故名無所畏。復次佛於一切
眾生最尊最上。盡到一切法彼岸。得大名聞。故自說
無所畏。復次且置是佛功德。佛一切世間功德亦無
能及者。所畏法一切已拔根本。故所畏法者。弊家生
弊生處。惡色。無威儀。麤惡語等。弊家生者。如首陀羅
所謂擔死人除糞養雞豬捕獵屠殺沽酒兵伍等卑
賤小家。若在大眾中。則多怖畏。佛從本已來。常生轉
輪聖王種中。所謂頂生王。快見王。婆竭王。摩訶提婆
王。如是等名曰種王家中生。亦以是故無所畏。弊生
處者。安陀羅舍婆羅。裸國兜呾羅。小月氏脩利安息大

秦國等在此邊國中生。若在大眾中。則多怖畏。佛在
迦毗羅婆中國生。故無所畏。惡色者。有人身色枯乾
羸瘦。人不喜見。若在大眾。則亦有畏。佛金色光潤。如
火照赤金山。有如是好色。故無所畏。無威儀者。進止
行步坐起。無有人儀。則有怖畏。佛無是事。麤惡語者。
有人惡音聲。謦吃重語。無有次第。人所不喜。則多怖
畏。佛無是畏。所以者何。佛語真實柔軟。次第易了。不
疾不遲。不少不多。不沒不垢。不調戲。勝迦陵毗伽鳥
音。辭義分明。不中傷物。離欲故無染。滅瞋故無礙。除
愚故易解。法喜增長。故可愛。遮罪故安隱。隨他心。隨

解說義深語妙。有因緣故言有理。譬喻故善顯示。事
訖故善會事。觀種種眾生心故禪說。久久皆入涅槃
故一味。如是等種種無量莊嚴語故。佛於語中無所
畏。佛但以如是等世閒法。尚無所畏。何況出世閒法。
以是說佛有四無所畏。問曰。佛十力中有無所畏不
若有所畏。不應但言四。若有所畏。云何言無畏。成
就。答曰。一智在十處。名爲佛成就十力。如一人知十
事。隨事受名。是十力。四處出用。是無所畏。是處不是
處。力漏盡力。卽是初二無畏。八力雖廣說。是第三第
四無畏。以是故。十力中有無畏。別說亦無失。正徧知

者。知一切法不顛倒。正不邪。如餘過去諸佛。是名三藐三佛陀。如佛告阿難。一切世間天及人所不能知。佛能徧知。故名三藐三佛陀。若有人言。是法不知。問曰。是何人。荅曰。是中佛說。若沙門婆羅門。若天若魔。若梵。乃至欲與佛論者。論何等法。有人言。佛所不說。外諸經書。弊迦蘭那僧佉韋陀等十八種大經書。有人言。須彌山。斤兩。大地深淺。一切草木頭數。有人言。是常無常。有邊無邊。十四難。佛不能荅。有人言。是法色法。無色法。可見不可見。有對無對。有漏無漏。有爲無爲等。佛但知一種道事。因緣。是異法種種。因緣。佛

或不悉知。沙門者說出家人。婆羅門者說在家有智人。天者說地天虛空天。魔者說六欲天。梵者說梵天王爲首。及一切色界。餘者除此更有餘人如實者。若以現事。若以因緣。難乃至不見是微畏相者。相名因緣。我不見小小因緣。如法能來破我者。以不見故。至誠言安立阿黎沙。此言聖主住處。佛至誠言。我一切漏盡。若有人言是漏不盡者。無有畏也。何等是漏。漏名三漏。欲漏有漏無明漏。復次漏名六情中出。垢心相應。心數法。復次如一切漏障。經中分別說七漏障道法。名諸有漏業。及一切煩惱惡道報障。爲世閒故。布施

持戒修十善道。受諸味禪。略說若能障涅槃。若善若不善。若無記。是名障道法。有人言。道名二法。聖定。聖慧。是二事等。達到涅槃。有人言。三聖道。無漏戒定慧。有人言。四法。所謂四聖諦。有人言。出世間五根。有言。六出性。有言。七覺意。有言。八聖道。達到涅槃。論議師等言。一切無漏道。達到涅槃。是中若有沙門婆羅門等。來如實言。是事不爾。乃至不見微畏相。以不見故。至誠言。安立阿黎沙住處。問曰。何以故。佛至誠言。安立阿黎沙住處。答曰。自功德具足。亦令眾生得安樂利益。若佛自得安樂住處。不能利益眾生。不名阿黎